



白田文集卷之十四

寶應王 巖篁

行狀

前河南道掌印監察御史晉階儒林郎喬公行狀

前河南道掌印監察御史晉階喬公卒於家其子英等介公姪孫出塵書述歷官行事遣使來郡城曰願為之狀巖忝公同邑後學又與公子姪有交則狀公以為銘傳碑誌先且將來上之史氏入正史名臣列傳皆於余言徵信此巖職也謹按英等行述公以天

啟壬戌進士選授中書科中書舍人尋請終養丁內  
艱服除起補前職掌印主考山西鄉試奉差冊封周  
藩諭祭葬大臣考選河南道監察御史巡視北城巡  
按浙江回道以都御史誣降應天府知事稍遷大理  
寺右寺正既北都國變南都起公河南道掌印御史  
陞太僕寺少卿掌京畿道刷卷清豫王兵下江南既  
定久之公以衰病致仕家居三十年以壽終公諱可  
聘字君徵又曰聖任天下稱聖任先生揚州寶應人  
生時母太安人得公晚欲不舉夢神人曰不可覆其  
首以珠冠乃舉公為人方正介特蒞官操守自將隨



所任皆著聲績幼穎敏讀書日夜不休太安人慮其  
過勞夜必早戒滅燈公俟母寢復篝燈默誦隣有屠  
者雞鳴每就而乞火嘗以應聲作句屈其執師又為  
鄉先生劉公靜之所器重辛酉舉於鄉明年成進士  
其始為中書舍人也會魏忠賢勢方張即請終養未  
幾朋黨禍起小人挾奄官以爭勝假三案為名日夜  
謀殺東林諸依附東林者本欲援門戶致美官後激  
成水火遂併倡首正人悉罹刑慘群小曰一網打盡  
矣公家居閉門布衣蔬食究心經史實學迄黨禍連  
染超然不與其難天下以為高其起補中書舍人也

逆黨謀翻逆案呂黃鐘媚張捷時捷為吏部侍郎尚  
書缺例推五部尚書及左都御史黃鐘忽請點侍郎  
為尚書以媚捷公特疏劾之群小側目及公出差過  
滋陽知縣成德郊迎拜謁德曰德素不迎送讀公參  
呂黃鐘疏故願見顏色也掌印時有閩樂山者以偽  
為璽書事發刑部鞫訊俱供此弊沿百餘年惟掌印  
中書喬某不受賄故事發耳天子聞而褒之其以庚  
午主考山西也一榜多知名士號為得人後多至顯  
位者其奉旨冊封周藩及祭葬李國樞曹于汴鄒元  
標往來四差行李蕭然贈遺一無所受還朝過鄉邑

知閩閩疾苦入朝有旱災請賑之疏有河決水災開  
周橋閘等事之疏時溫體仁當國知公正入遣人致  
意曰喬君但投一刺臺省可立得也公笑曰區區中  
書安敢入宰相之門乎京師傳其語以為美談中書  
十年始考選河南道御史巡視北城權奸戚里人人  
斂跡獄訟多所平反有官守言責之疏天子嘉焉御  
筆大圈六十四宣付史館公之巡按浙江也獎廉吏  
懲貪風辨寃獄鋤豪強先是未入境浙士夫相戒曰  
喬按君來我輩各宜自愛二年之內七十五州縣之  
權貴無敢干以私者俗習侈靡公為崇禮抑奢浙風

一變有贖錢萬餘兩盡充軍餉不私一錢又以其餘  
修孔廟賑貧生杭州地狹多水俗火葬公惻然區畫  
數千兩置義塚數十區出巡金華距城五十里山水  
驟發舟不前求絳夫不得知縣盛王贊遙呼曰農忙  
甚知縣負弩矢先驅公冒雨陸行道病既而知其愛  
民也薦之他所薦官有未謝者公曰故人知君君何  
不知故人乎出京時都御史陳乾陽以武康知縣蔣  
聯芳囑公薦廉知縣芳貪甚劾之乾陽懷怨會公薦  
文德翼乃誣為庇貪遂左遷其復起河南道也有大  
計急宜早決疏有傳宴會修實政疏有罷殿衛疏有



薦舉張瑋疏給事中袁彭年建言被黜有人才可惜  
言路當容疏御史黃耳鼎外轉疏劾都御史劉公宗  
周朋黨為奸內牽金光辰諸正人得旨嚴切蓋馬士  
英阮大鈺欲傾劉公也公疏稱宗周開誠布公真社  
稷臣耳鼎薄外官一再疏謗堂官株引善類無人臣  
體請以耳鼎所轉瑞南道願自為之事遂已陞太僕  
少卿公之致仕而歸也閉門讀書不通書問其門生  
故吏造廬請見者不一見也惟姻家吳公鹿友李公  
心水相往來言經典稼穡而已自號柘田逸農公世  
居寶應柘溪力農曾祖某祖某父份以公貴贈文林



郎河南道監察御史加級儒林郎母沈氏贈太安人  
父多善行少為里廩長嘗以催科入城租急方窘迫  
道拾遺白金三十兩坐待其人還之市木沙溝木商  
與木誤多數十僕携歸矣亟補償其直除夕檢逋負  
券有貧者悉焚之以為常生二子長某公其次子也  
自公起家歷官而宗益大公性介特居官屏絕饋遺  
自入仕至官成未嘗以一贖于有司與人寬和而辨  
文至嚴京師惟黃石齋倪鴻寶袁臨侯馬素修陳幾  
亭諸公辨論政治得失人材邪正學術真偽期必見  
施行外此閉門不見也性儉朴雖貴衣服飲食無所

加聲色伎樂終身不與晚益志於理學獨坐小樓平  
日擁書萬卷手不釋書籍連屋無不丹黃數過老乃  
脫略文字所著多散佚有自警編卧榻隨筆緒言諸  
書皆不示人平生精力甚健老猶善飯素無疾忽一  
日呼集家人曰吾欲長辭汝等矣衆驚愕乃命童子  
收架上書起步庭宇凡平日行止坐卧處徘徊延佇  
子孫急召醫曰吾無疾也醫何為越二旬而逝公生  
明萬曆己丑八月二十八日卒清康熙乙卯閏五月  
七日得年八十有七娶王氏早卒贈安人及子貴贈  
孺人又娶於潘封安人卒贈太孺人側室孫氏男子

子五邁增廣生先公卒英歲貢生候選訓導萊丁未  
進士今內閣中書舍人薇國子監生蓋縣學附生女  
子子二一適今戶部員外郎吳元萊一適今縣學廩  
生劉士壯孫男九崇禮縣學廩生崇祖崇烈國子監  
生崇仁崇道崇哲崇醇崇讓崇修孫女十一一適縣  
學附生李敏孫一適劉以儀一適趙益一適李炳竹  
一許劉國敬一適丘鳴鳳一許朱經一許黃之鈞餘  
俱未字曾孫八深湛溥沆浩泓治洽曾孫女三一許  
胥珂一許朱澤溥餘未字子孫婚娶多江淮名族詳  
在英等自為行述故不贅公晚而求道隨所處皆有



箴銘以自警語皆古聖先賢身心之學又多超逸自得語今不可悉紀節採一二見公之深於學焉曰昔衛武公蘧伯玉不以年老廢學而忘箴警彼皆聖賢勤修如此余碌碌老年學道嗟其晚矣收斂身心責志自警一息尚存此志未已又書辟訓子曰無莊周之達而知魚樂無茂叔之靜而愛蓮香無元亮之高妄意義皇一枕無堯夫之學漫吟雪月風花無康齋之收斂身心而羨綠陰清晝無雲從之沈酣義理而慕水居優游內不足外有餘君子所耻也可不大懼乎先儒以玩物為害道所從來矣以此自警庶幾得

白曰文集卷之四  
之公至將終而無疾日步於庭會天空雲淨吟曰心  
靜始能知白日眼明方會識青天語多曠達其諸家  
訓皆可世守弗忘巖狀公歷官行事而終以此以見  
公立朝遊宦凡方正介特之節所以立身事君有裨  
於世者其源皆出於好學及晚而有見又如此庶幾  
銘諸墓隧載之惇史俾後世有考焉

王君懷先生行狀

王君懷先生既卒之三月其二子彬彬手其行述再拜涕泣曰必子言也為先人狀者嗟乎余雖不敏然樂道人善以傳於世而又與先生二子游有世好則先生之古心善行好義樂施皆宜見於余文庶幾先生之宜誌宜銘宜列傳於史氏他日有立言君子於余言有徵信也不可以不狀謹狀先生生而醇朴寬和愛人與兄弟友讓處宗族鄉黨有恩里有柏某臨大獄先生知其冤力白縣李侯士裒為平反又代輸贖醵柏某死妻子流離復代贖其產賈人朱某母錢



缺貸金百兩居貸不讎盡耗之病且死其家以田償  
先生曰彼室如懸磬妻子何恃而棄此乎立為毀券  
朱某病亟復貸之其用恩不責報如此有以盜牽連  
者鄉里素稱善先生力救卒全身家致金帛謝却弗  
受其於鄉黨急人之難多此類也先生孝友敦睦與  
兩兄分產多推讓而伯兄允世亦能讓取薄田已而  
乏絕恒賴先生舉火伯兄卒撫遺孤視其子有從弟  
多子而產薄每傾橐以助仰給先生數十年其長子  
曰榜先生以為才恩勤尤至卒成進士其厚於兄弟  
宗族大節最著者如此其他排難解紛福人者甚多

故內外親疏無間言順治某年月日以疾終年六十  
三先生長身古貌衣冠甚偉人望之肅然即之溫如  
也與人誠實無欺久乃愈篤幼受經為縣學附生督  
學嘗以德行旌既老縣舉鄉飲大賓疾革從容和適  
無展轉系戀之態命其子以為善不及其他及卒諸  
兄弟宗族鄉黨無老弱皆為哭泣曰安得復有仁善  
好施如公先生寶應人諱允錫君懷其字也姓王氏  
其先錢氏吳越武肅王裔子孫散徙或在蘇州又徙  
寶應九世祖 通出嗣姻戚王氏始因其姓祖可謙  
父茂嘗獨力治生及家裕與兩弟三分之配成氏無

出側室王氏先生本錢姓故娶於王子男二彬鄉試  
舉人彬縣學附生孫男三遐齡奕齡彭齡皆幼孫女  
二皆幼余以避亂奉母居寶應與子野修木交子野  
彬字修木彬字也余貧遷徙借屋以居子野兄弟數  
為余言欲貸金為老母謀居余雖謝弗受然即其處  
朋友之母知其孝友人也因以知先生行事甚悉夫  
士不必顯要於范俗王烈之居鄉爭訟就質者望廬  
而返田疇之在徐無山中環而歸者五千餘家以匹  
夫而制刑議禮使道不失遺二子型范風俗與賢相  
臣曷異吾觀先生湛恩沾彼宗黨內外無間言惟其